

مؤسسات خاصة  
استمارة مسرحية

اسم المسرحية: مجود في كوكب \* حمية رقم (٣٦)

تأليف: مريم سيف

إخراج: حمد بور سعيد

إنتاج وتقديم: البحر للإنتاج الفني \*

مكان العرض: سينما الدوحة \* مسرح قطر الوطني \* دبي \*

تاريخ العرض: ٢٠٠٧/١٢/١٦ ٢٠٠٨/٥/٢٨ ٢٠٠٧/١٢/٢٧ \*

عدد العروض: ١٠ عرض ٣ عرض ١١ عرض \*

عدد الرواد: ١٠٠٠ متفرج ١٢٠ متفرج ٣٠٠ متفرج \*

ملاحظات: \* حمية للأطفال

\* مؤسسة محلية خاصة

\* مهرجان (دبي) للشعر

\* المسرحية تعرضت على ثلاث فترات

\* مجموع العروض (٢٤) عرض - مجموع الرواد (١٦,٥٠٠) متفرج

عبدالله بن  
وحدة التوثيق

المجازي

بسم الله الرحمن الرحيم

الأبجر للإنتاج الفني تقدم

"مسرحية الأطفال"

عبود في SCHOOL

تأليف: مريم سيف

الخارج  
م. ه. بورشيد

" 2000 "

(تم عرض هذه المسرحية على ضيفات مسرح سينما الدوحة  
بإشراف أول أيام عيد الأضحى المبارك الموافق الخميس ١٦/٤/٢٠٠٠)

الشخصيات :

١. أبله دلال . . . مدرسة.
٢. سالم . . . طفل أناني ومغرور.
٣. راشد . . . طفل ليس له شخصية.
٤. صلاح . . . طفل خفيف الظل بدين يجب الأكل.
٥. جاسم . . . طفل وديع مسالم.
٦. جميل . . . طفل عصبي.
٧. عبود . . . طفل مرح طيب القلب.

\* مجموعة من التلاميذ.

\* مجموعة من الاستعراضيين.

## الفصل الأول :

"المدرسة دلال تدخل مع المجموعة الاستعراضية في الأغنية الافتتاحية وتصور الأغنية نشاط الطلبة الصباحي ثم دخول الباص المدرسي الى الساحة ونزول الطلبة ويتحول المنظر الى فصل دراسي ويبدأ دخول الطلبة الى الفصل يدخل سالم وراشد مسرعين ومرتبكين الى الفصل" :-

سالم : راشد وقف . . . وقف عندك وصوت على اذا شفت احد جاي راشد:حاضر..بس يلا بسرعة " يصرخ راشد " ياك

سالم : شفيك ، شفيك ، في حد جاي

راشد : لا . . أسوي بروفة بس

سالم : بروفة عليك انشاء الله ، روح وقف ، روح،واللا اقولك ساعدني خرب شوي معاي الطاومات والكراسي...بسرعة ياللة كسر ..كسر.

" يذهب راشد ليقف وفجأة يدخل "صلاح" فيرى الحدث. "

صلاح : انتو شقا عدين اتسون ، ها.

سالم: " مرتبك" شن سوي ما في شيء ، دخلنا لقينا الفصل معفوس

صلاح : معفوس ، بس انا شفتكم ، شفتكم ، طحت عليكم . . كوم . . كوم وانتو

انتو تخربون وتكسرون...بعلم عليكم الابله.

سالم : صلوح لا تعلم احد ، عندي لك أكل وايد هاك خذ اكلي كله

" يقوم بإعطائه شنطة الطعام ."

صلاح: ما يكفي . . ما يكفي . . بأعلم عليك

سالم : صلوح خذ اكلي واكل رشود كله لك ، بس اسكت

راشد : شنو علي كيفك ، لا يبه ، جيب اكلي زين ، انا جايب بلاليط اليوم

صلاح: خذ ، اصلا انا ما احب اكل خيوط ، ما أشبع ، ما أشبع "صلاح يأكل  
بشراه"

سالم : خليني أقوم عنه ، لا ياكلني بس .  
" يدخل جاسم بوجهه يبكي واه . . واه "

راشد : وصل بود معه ، أشفيك انتة من الصبح سندارة  
جاسم: ما أبي المدرسة ، أبي ارجع البيت -بيكي-  
" يقوم سالم باخذ الطعام من جاسم "

سالم : خلاص . . خلاص . . لا تبكي باخذك البيت ، بس عطني هذا . . قصيت  
علية، خد يا صلوح هذي فوق البيعة وما أبغي السانك يتحرك في حلجك .  
" يدخل جميل معصب ومستغرب "

جميل : من شايل كرسيي ومن حرك طاولتي ومنهو خرب الفصل  
سالم وراشد : (بسرعة) احنا ما ندري ، دخلنا لقينا المكان عفيسة  
جميل : مني هذي نفيسة اللي كسرت الصف؟  
راشد : نقول لك عفيسة ، عفيسة ، مب نفيسة.  
" تدخل المدرسة وهي تحمل الكتب ويجري سالم ، ويساعدها ويضع  
الكتب على طاولة مكتب المدرسة "

سالم : صباح الخير يا أبله.  
المدرسة : صباح الخير يا طلاب يا شاطرين.  
الطلاب: صباح النور والسرور يا أبله دلال.  
المدرسة: منهو اللي مخرب الفصل بهذا الشكل؟  
سالم : ما ندري يا أبله ، سالي رقيب الفصل.

المدرسة: وینه رقيب الفصل عبد الله ؟

راشد : متأخر ، متأخر يا أبله.

سالم : مثل كل مرة ، عبود دائما يتأخر وانتی تسامحینه ، هاوشیه مره واحده

بس ، ایه لانه انتی یا أبله تحبینه اکثر واحد.

المدرسة : لا یا سالم ، انا احب كل تلاميذی . . . بس المجتهد له عندي نصيب

وعبدالله طالب مجتهد.

سالم : شاهدين ، كله عبود ، عبود.

" نسمع صوت هدير البطبطة من الخارج وصوت عبود يتحدث "

عبدالله : لا تقول عبود مع هالویه ، أنا اسمی عبدالله.

المدرسة : تعال یا عبدالله حالا.

" يدخل عبدالله راكب البطبطة "

عبدالله : حالا یا أبله . . . ممكن اصفت سيارتي اهني؟

المدرسة : ليش متأخر یا عبدالله.

عبدالله : اشویه ظروف صعبة با أبلتي دلال.

المدرسة : ممكن اعرف هذي الظروف.

عبدالله : بعد ما صحيت من النوم . . . أمي حطت لي الريوق . . . الحليب كان

حار والكورن فليكس انكت على الارض وصارت مصيبة وامي طقتني ،

وابوي هاوش امي ، والخدمة تنظف وتبجي وبعدين جيت المدرسة لقيت

سيارتك في الموقف الخاص مالي. " يلتفت الى الفصل " شنو صاير منو

اللي موصخ الصف جذيه ؟ ؟

سالم : مب أنا . . .

راشد : أنا مالي خص. " يلتفت عبدالله الى صلاح "

صلاح: مب احنا ، احنا ما لنا خص

جاسم : ولا أنا ييكي ، أبي أروح البيت.

المدرسة: يا طلاب لازم يتم ترتيب الفصل بسرعة وبعدين راح اعرف منو اللي عمل هذا الشيء وراح يتعاقب ، أما بالنسبة لك يا عبود فمن اليوم ورايح مب انت رقيب الفصل.

عبدالله : ليش ، ليش يا أبلتي.

المدرسة : لانه من مهماتك المحافظة على نظام ونظافة الفصل.

عبدالله : بس يا أبله . . بس أنا ما سويت شيء

المدرسة : لا سويت إهمالك وتأخيرك وعدم وجودك في الفصل اهو عطى الفرصة لغيرك علشان يخرب الفصل .خلاص يا عبد الله الرقيب راح يكون سالم .  
" يقوم سالم بالتصفيق مع راشد في محاولة لاستفزاز عبد الله "

المدرسة : ياالله يا شطار كل واحد يرتب كرسي في مكانه الصحيح عشان نبدا الحصة

" يقوم الطلبة باعادة ترتيب الكراسي ويقوم كل الطلبة بوضعها في المقدمة وكل شخص يحاول ان يجلس في المقدمة "

صلاح : هذي مكاني هني

جميل : وخر.. وخر زين هذا مكاني أنا .

جاسم : أصلا هذا مكان مكاني

راشد : من الذي يقول هذا مكاني

" تعلق الأصوات بين الطلاب "

المدرسة : خلاص يا طلاب هدوء .. الكل راح يقعد في مكانه ، من الذي كان في الاول "

الطلاب : أنا .. أنا يا ابله " الجميع يرفعون أيديهم "

المدرسة : ياربي أش هل المصيبة .. اشلون احل هذه المشكلة

سالم : لا تعبين روحك يا ابله أنا بحل المشكلة مب أنا الرقيب " موجه حديثه للطلاب " ..الأبله غيرت أماكنكم .. عبد الله .. " عبد الله ينهض من مكانه " لا .. لا .. أنت في مكانك لا تتحرك ..صلاح .. أنت مكانك جدام عبد الله وجاسم جدام صلاح و جميل جدام جاسم وراشد جدام جميل وأنا جدام راشد والأبله "مفكرا" تحركي .. تحركي على كيفك يلا يا طلاب يلا كل واحد مكانه " الجميع يجلس في مكانه " اشرأيك يا ابله في العريف الجديد .

المدرسة: شكرا يا سالم أتفضل مكانك .. اليوم درسنا عن الحيوانات الغير أليفة  
صلاح : " لعبدالله " شنهو يعني غير اليفه ؟ ؟  
عبدالله : يعني ما يتسبحون بالليفة.  
المدرسة : لا يا عبدالله . . . وبعدين أنا ما وجهت لك السؤال ، جابوب يا صلاح  
صلاح : يعني حيوانات ما عندها شغل غير انها تأكل وبس.  
عبدالله : " لصلاح " يعني مثلك.  
المدرسة : وبعدين معاك.  
عبدالله : ابي اجابوب مثلهم.  
المدرسة : " تتجاهل عبدالله " ، جابوب يا سالم .  
سالم : إيه يا أبله ، يعني الحيوانات المفترسة . . مثل . . مثل الخروف  
المدرسة : خطأ يا سالم ، الخروف حيوان أليف.  
الطلبة : " يضحكون " .. باع .. باع .. مباع .. مباع  
سالم : " مرتبك " مثل . . مثل يفكر ، " ينظر الى راشد "  
راشد : الدجاجة.  
الطلبة : الغشاش ، الغشاش  
سالم : انزين باراويكم بعد الحصة كلكم ، يا ويلكم مني  
المدرسة : تغش يا سالم

سالم : لا ابله هذا . . هذا صوتي طلع من حلق راشد  
المدرسة : اعتمد على نفسك يا سالم وفكر ، جابوب يا جاسم  
جاسم : ما اعرف يا ابله " بيكي " ابي اروح البيت  
راشد : ودوه البيت هذا سندرنا.  
المدرسة : يلا يا عبدالله عطنا مثال عن الحيوانات غير الليفة.  
عبود : سؤالج وايد صعب يا ابله ، ما فيه احتمالات.  
المدرسة : السؤال سهل يا عبدالله جابوب.  
عبدالله : حاضر وأنا اقدر أقول غير حاضر .. مثل .. مثل الاسد ومرته .  
المدرسة : ممتاز . . ممتاز يا عبدالله.  
سالم : "وممتاز" بس حق عبدالله.  
المدرسة : منهو يقول لي شنهو اسم مرت الاسد؟  
عبدالله : اسمها سماح  
المدرسة : لا يا عبدالله انثى الاسد اسمها اللبوة.  
عبدالله : لبوة  
المدرسة : انزين الحيوان يقول: أنا طائر كبير ، لي جناح ولا أطيير ، من أنا ؟ ؟  
الطالبة : " بصوت واحد " ابله دلال.  
المدرسة : لا.لا. أنا أسأل سؤال ، اقول لكم لغز واللغز يقول طائر كبير له جناح  
ولا يطير.  
جاسم : ابله هذا فيل . . فيل يا ابله.  
المدرسة : خطأ يا جاسم ، منو يعرف الجواب ؟  
الطالبة : بصوت واحد وعالي : أنا . . أنا.  
المدرسة : جابوب يا راشد  
راشد : ذبابة  
المدرسة : خطأ . . . الذبابة حشرة

الطالبة : " بصوت عالي " أنا . . أنا

جميل : " يقف يفكر " نسيت (يجلس).

الطالبة : " بصوت عالي " أنا . . أنا.

سالم : ابله الطائر ضعيف والا متين ، برقية والا من غير رقبة.

المدرسة : له رقبة طويلة.

سالم : لا عيل مب صلوح "وهو ينظر الى صلاح" صلاح ما عنده رقبة

صلاح : أنا ما عندي رقبة . . آبله . . " تهديد لسالم " . . ابي اقولج شئ

سالم : لا . . لا يا صلوح أنا أضحك معاك.

صلاح : قللي آسف احسن لك بسرعة.

سالم : آسف .. آسف

صلاح : انزين خلاص.

عبدالله : من كم حرف يتكون اسم الطير يا آبله .

المدرسة : من خمسة حروف.

عبدالله : عطينا اول حرف.

المدرسة : نون

عبدالله : وثاني حرف.

المدرسة : عين

عبدالله : وثالث حرف

المدرسة : الف

عبدالله : ورابع حرف

المدرسة : ميم

عبدالله : وخامس حرف

المدرسة : هاء

## " عبدالله والطلبة يفكرون "

عبدالله : عرفته . . عرفته . . بطة  
المدرسة : خمسة حروف يا عبدالله . . ن ع ا م هـ يعني بطة  
عبدالله : انزين بطتين . . صاروا خمسة حروف يا أبله.  
المدرسة : الطير هو النعامة.  
الطلبة : ايه نعامة . . نعامة

### " تقوم المعلمة بادخال النعامة الى الفصل "

جاسم : " بخوف وبكاء " يمة .. يمة تخوف " يجري ويختبأ التلاميذ يضحكون "  
• أغنية عن النعامة تقوم بغناءها المدرسة مع الاطفال يتم فيها شرح درس  
النعامة من خلال كلمات الاغنية ويغني معها التلاميذ في بهجة ومع انتهاء  
الاغنية يتم خروج النعامة.

سالم : الله ، الله يا أبله النعامة طائر جميل ورشيق " يقوم بعمل حركات يقلد بها  
الطائر فيخاف جاسم من سالم فيهرب الى راشد الذي يقوم باخافته فيجلس  
ويبكي".

جاسم : يمه وين أمي أنا خايف ، ابي اروح البيت.  
عبدالله : حرام عليكم تسون فيه جذيه ، هذي من غير نعامة يبي يروح البيت.  
" صوت جرس المدرسة "

صلاح : يا سلام صار وقت الاكل مع السلامة يا أبله دلال.  
سالم : احترم نفسك ، ووقف مكانك خل الابله تتفضل بالانصراف.  
المدرسة: شكرا يا سالم ، على فكرة عندي لكم مفاجاه .. راح تعجبكم .. باكر  
بنروح رحله الطلاب : "بفرح " هـيه

صلاح : ابله وين بنروح المول  
سالم : لا ييا علاء الدين فيه العاب وايد

عبدالله: لا .. لا ما نبي علاء الدين ودونا المتحف

سالم: على كيفك أنت إحنا نبي العاب

المدرسة: هدوء الرحلة بتكون جميلة ومفيدة ولا تخربون المفاجاهه والحين روحوا

اكلو زين ولا توسخون ملابسكم .. تذكروا الشوكولاته ممنوعة .. يلا

مع السلامة .

سالم: مع السلامة يا أبله دلال.

" يفتح لها الباب وتخرج يقوم راشد بإخافة جاسم "

راشد: شوف .. شوف يا بو دمعة أنا شبه النعامة

" يركض وراءه فيهرب جاسم ويختبئ خلف عبدالله "

عبدالله: قلت لك خلاص ، حرام بعدين قلبه يوقف من الخوف.

راشد: انت مالك خص ، لمن تكون انت الرقيب تحجى.

عبدالله: عيل منهو الرقيب.

راشد: ليش أنت ما تدري .. سالم الرقيب.

سالم: اسكت يا عبود من اليوم ورايح أنا الرقيب اسكت والا راح احرمك من

الاكل معانا " يلتفت الى صلاح " وانت هات الاكل مالنا أنا وراشد.

صلاح: انتة عطيتني إياه .. وأنا ميت من الجوع.

سالم: " يدفع صلاح بعنف " يا المتين ، انت لازم تقعد سنة ما تأكل ، يلا روح

سو رجيم يلا.

" يخرج سالم ويخرج خلفه راشد "

عبود: لا تزعل يا صلوح تعال كل معاي أنا وجاسم.

صلاح: سلوم مغرور ويحب نفسه وايد وانا عندي شيء لازم واقوله لك يا عبود ،

ترى سالم وراشد هم اللي خربوا الصف علشان الابله تختاره اهو ..

سلوم العريف وتشيلك انت.

جاسم : اصلا هو يغار منك لانك طيب وتساعد الجميع وهو مب طيب يخوفنا مع  
راشد رفيجه.

عبد الله : و ليش ما قلت لي يا صلاح ليش خشيت علي.  
صلاح : لأن راشد عطاني اكله ، يدري اني احب الاكل سامحني يا عبود .. أنا  
آسف .. يا عبد الله " يبدو عليه الندم "  
عبد الله : لا تخافون من سالم يا اصدقائي سالم واحد واحنا مجموعة ... والمجموعة  
دائما هي اللي تغلب.

نهاية فصل.

## الفصل الثاني :

ترفع الستار بدخول باص المدرسة الى ساحل البحر ونزول الطلاب  
بنظام ونشاط ويتضح تعاون الجميع في افراغ حمولة الباص من الادوات

الخاصة بالطلبة .

\* أغنية توضح ضرورة محافظة الانسان على البيئة وحمايتها

ونظافة السواحل كما تحت على العمل والتعاون بين الافراد

لاظهار الشواطئ بصورة جميلة في نهاية الاغنية نرى الجميع

ياستثناء عبدالله .

الابله : صبحنا جميل ... احلى صباح ... وطن جميل ... احلى وطن .

صلاح : الله ريحت البحر حلوه ( يستنشق الهواء ) .

راشد : ياسلام المكان جميل ... يالله ياشباب نلعب كورة .

الابله : لحظة ... لحظة ... احنا بنلعب وبنستانس ، بس بعد ما نظف

المكان

جميل : ابله احنا البلدية ... احنا مالنا خص ... غيرنا يوصخ واحنا

نظف .

الابله : هذا وطننا واحنا لازم نحرص على انه يكون نظيف وجميل واذا

غيرنا يوصخ مب معناه ان احنا نكون مثله ...

صلاح : ابله انت يايبتنا نستانس ولا تشغلينا .

الابله : الاثنين ياصلاح

سالم : اللي تقوله لإبله صح ... " يصرخ بصوت عالي " طابور

الفصل استعداد " الكل يقف في الطابور .

الابله : الطابور كامل ياسالم .

: وين باقي الطلبة ياسالم

سالم : كلنا موجودين يا أبله بس عبود ماندرى وينه

المدرسة : اشلون ماتدرى مب انت رقيب الفصل

سالم : أبله يمكن زعلان عليج ومحاربج علشان حطيتني رقيب بداله

المدرسة : " تطلق صفرة " عبدالله يا عبدالله .

" ينزل عبدالله من الباص بحذاء واحد "

عبدالله : نعم يا أبله دلال

المدرسة : وينك أنت ... وين حذائك الثاني يا عبدالله

عبدالله : الله اعلم يا أبله ما أدري وين راح حذائي الثاني

سالم : يمكن زعل من الأول " يقوم بإخراج الحذاء من وراء ظهره  
ويعطيه لراشد "

راشد : حلوه ... حلوه ... " راشد يقوم برمي الحذاء بعيداً "

تنظر اليهم المدرسة فيتظاهرون بالتمارين ، واحد اثنين ثلاثة

المدرسة : روح يا عبدالله دور على حذائك في الباص

عبدالله : تعبت يا أبله - دورت عليه تحت كل كرسي ما لقيته

سالم : يمكن ناسيه في البيت

عبدالله : اشدعوه بأطلع من البيت بحذاء واحد ، طالع وانا نايم ...

لحظة ... لحظة عندي فكرة ،

\* يتجه نحو سالم محاولاً التأكد من حذاءه

سالم : وخر زين " جوتيك معروف مال كولييه ، حذائي غالي شاريه

من المول

عبدالله : يلا زين لاتقص علينا شاريه من سوق واقف

راشد : حلوه حلوه يا عبود - هاها -

سالم : " بعصبيه " رشود

راشد : مب حلوه ، نكتتك سخيغه يا عبود

\* عبود يسقط راشد على الارض وينزع حذائه \*

عبدالله : وانت شاريه من المول ولا من السنتر

راشد : لا من الجمعية

عبدالله : اشوفه من النوع الغالي " ويتركه ويتجه نحو صلاح " بل مب

ريل عليك اشدعوه هذا جوتي ولا حوت

" يتركه ويتجه لجاسم " : اشوف ياسلام اريوله صغيره

ويتجه للمدرسة .

المدرسة : عبدالله انت ايش قاعد اتسوي .

عبدالله : الامير يا ابلتي عرف سندريلا من حذاءها

جميل : يلا آبله أحنا مستعدين نبتدي تنظيف الساحل .

عبدالله : مراح انظف قبل ما الاقى حذائي

المدرسة : انت مسؤول عن اغراضك وحذائك محد يدور عليه إلا أنت

" تطلق السفارة " يلا خلونا نبتدي عملية تنظيف الساحل

**عبدالله :** إنشاء الله يا أبله ، بس من وين نبتدي ، الشاطئ وايد كبير

**المدرسة :** انت روح دور على حذائك وبعدين تعال - يلا بسرعة

" عبدالله يواصل البحث عن حذائه "

**المدرسة :** راح نتقسم إلى مجموعتين ياطلاب

**صلاح :** ليش يا أبله ، أنا بلفه وحده أنظف الساحل كله

**عبدالله :** " من بعيد " أبله صلاح بلفه واحده ينظف الخليج العربي كله

**المدرسة :** دور حذائك وتعال يا عبدالله " تحدث الطلبة " التقسيم يسهل

#### عملية التنظيف

**سالم :** أنا ابي صلاح وجاسم في مجموعتي يا أبله

**المدرسة :** وراشد وجميل بعد - راح تكونون تحت قيادة الرقيب سالم

وأنا هاذي مجموعتي

" يأتي عبدالله بفردة حذائه "

**عبدالله :** لقيته - لقيت حذائي يا أبله

**سالم :** أنا دايماً متأخر عن العمل يا أبله

**عبدالله :** أنا وين أروح يا أبله اهنيه والا أهنيه

المدرسة : مع مجموعة سالم يا عبدالله

عبدالله : ابي اكون في مجموعتك يا ابله لو سمحت

المدرسة : وممكن اعرف ليش

عبدالله : لأن عند سالم الشغل كله راح يكون علي مجربة قبل صدقيني يا

ابله .

المدرسة : سالم الرقيب ولازم تسمع كلامه يلا أنضم للمجموعة

المدرسة : وقبل ما اروح ياطلاب احب اقولكم واحذركم هاذي ، المنطقة

خطرة ، منطقة عميقه ما أبي أحد يقرب منها

جاسم : ليش يا ابله ، بياكلنا الحوت

المدرسة : ممكن تغرق يا جاسم

صلاح : انا بطفح يا ابله

المدرسة : سالم انت المسؤول ، انت اللي راح احاسبك لو أي احد قرب هناك

سالم : ثقي فيني يا ابله ، أنا أنسان نبيه والكل يسمع كلامي

صلاح : بسك غرور ، عبود والله ودي أخذ سلوم واربطه من كذلقه

عبدالله : ياسلام بعدين انا ديه سلوم بوقرعه بدل سلوم بو كذلة

جاسم : ممكن نخط إشارة علي المنطقة الخطرة يا أبله

المدرسة : فكرة ممتازة بس لو تركزون تشوفون الاشارات التي حطتها

الدولة في كل مكان توضح أن المكان خطر وممنوع الاقتراب يلا

سمعوا كلام الرقيب

راشد : وخصوصاً بعض الناس

عبدالله : بعض الناس يسمعون الكلام ، دير بالك على روحك لاتغرق

انته بس

صلاح : "همساً" هاذيه أنا أنفخ عليه نفخة وحده إلا هو وراء المنطقة

الخطرة "تذهب المدرسة مع مجموعتها لتنظيف القسم الآخر من

الساحل"

سالم : ليش الاغراض فوق بعض ، وين الترتيب

جميل : يلا يا طلاب ، رتبوا ، رتبوا

صلاح : ياه احنا تعبنا نشتغل وانتو قاعدين ماتساعدونا

راشد : سالم الرقيب وأنا مساعد الرقيب وجميل مساعدي يعني احنا

مسؤولين عن العمل

سالم : يلا اشتغلوا مابي كلام وايد

ياصلاح شيلوا هذا الصندوق وخطوه أهنيه ... وإلا اقولكم

خطوه أهنيه ... ها أيش رأيك ياجميل

راشد : لا ... لا هناك احسن

" صلاح جاسم ينقلون الصندوق من مكان ألى آخر " والا أقول

لكم خطوه هناك

صلاح : وين وين أنا هلكت

سالم : هناك ماتشوف ... ترى مب أحسن لك آذا زعلت عليك

جاسم : لا ... لاتزعل انشاء الله علي أمرك - لاتزعله ، ترى احنا مب قده

اذا زعل ولا تنسى أنه الرقيب

" يحملان الصندوق "

راشد : يالله بسرعه - بعدين هذا الصندوق مال من

صلاح : هذا شنطة الاكل مالتى - ينقلان الصندوق -

راشد : شنو تاكل يهال انتة

سالم : عيل مدام الصندوق أكل - خلوه أهنيه قريب منى

صلاح : ياه خلاص .. عاد أهنيه وإلا هناك - عصبية - " يرمي الصندوق

فيقع على قدم سالم "

سالم : أي .. أي لحقوقا علي

صلاح : أسف .. أسف ماكان قصدي

سالم : " مهدداً صلاح " ما كان قصدك أنا أوريك " سالم يصرب

صلاح "

صلاح : أي ... أي ... أي

عبود : حرام عليك لا تضربه

سالم : أنت تسكت وكلمه

سالم : يلا يا عبود تعال خذ هذي الادوات ونظف

عبدالله : إنشاء الله أنا راح أنظف ، وحضرتك ايش راح تسوي

سالم : انت تنفذ وبس يا صلوح يا جسوم يلا يلا معاه

عبدالله : لا يا سالم احنا ما اتفقنا علي جذيه !

سالم : وليش نتفق أنا الرقيب وأنا قائد المجموعة

راشد : يعني تسمع الكلام وبس

عبدالله : يعني احنا نشتغل وانتو مرتاحين

جميل : كلام سالم يتنفذ من غير نقاش

عبدالله : ياسالم انت كسول واناني وأنا راح أقول حق الابله

سالم : أنا اللي بقول حق الابله أنك ما تسمع كلام الرقيب

عبدالله : روح قول انا مب خايف منك أنا على حق

صلاح : صح عبدالله على حق واحنا معاه

جاسم : خلاص نشتغل الحين وبعدين نعلم الابله

عبدالله : احنا راح نبتدي عملية التنظيف علشان احنا وعدنا الابله مو

علشانك ياسالم ، وبعدين يصير خير

" جاسم وعبدالله وصلاح : يبدؤن عملية التنظيف "

" سالم وراشد وجميل " يفتحون الصندوق ويأكلون منه "

جاسم : شفت يا عبدالله حركات سالم

صلاح : أيه سالم بو حركات - يخلينا احنا نشتغل واهو قاعد مرتاح

عبدالله : أيه خايف علي كذلته ، ابوكذله ، ما عليه أحنا نظف علشان

الابله وعلشان نقوم بدورنا أتجاه الوطن

صلا ح : واهو قاعد يأكل ويشرب

عبدالله : ادري انت هذا الله ذابحك

صلا ح : اشلون عيل ، أنا أصلاً خايف على صندوقي

عبدالله : أي صندوق

صلا ح : تشوف هذاك الصندوق الصغير .. هذا أهوه

عبدالله : الله عليك هذا صغير يا صلا ح مسكينه الوالده والله

جاسم : عبود أنا تعبت

عبدالله : وأنا بعد تعبت أخ ياريولي

جاسم : لازم لازم نكمل علشان الابله تعرف شلون احنا قاعدين نشتغل

عبدالله : صح وعلشان يكون هذا المكان أجمل مكان وأحلى مكان

صلا ح : وبعدين يرجعون الناس يوصخونه

عبدالله : اذ الناس مثل بوكذله .. لازم يوصخونه

صلا ح : عيل تعبنا مثل قلته

عبدالله : تدرون أنا عندي فكرة

جاسم : شنو يا عبدالله

عبدالله : راح نسوي بعض اللافتات التي تدعو للنظافة

صلاح : ولافتات علي أن الشاطئ لازم يكون جميل

جاسم : ياسلام احلى فكرة

عبدالله : ياسلام سلم عليك يا أبو الأفكار يا عبدالله

صلاح : بس نبي نرتاح شوي يا عبدالله

عبدالله : خلوني اشوف الجماعة ياسالم يلا ساعدونا دوركم في

التنظيف لوسمحتوا

سالم : دورنا في شنو يا عبود

عبدالله : في التنظيف يا أخي - لازم تكون عادل يلا خذ الادوات انت

وربعك وإحنا راح نرتاح شوي

راشد : وليش هذي الراحة اشتغلوا معنا

صلاح : احنا عندنا شغل تاني - افكار أخرى

عبدالله : احنا قررنا انسوي لافتات تدعو لنظافة الشاطئ والمحافظة

عليه

سالم : روح زين يبه أحنأ تعبانين ونبي نرتاح وبعدين أنا العريف

يلا روح كمل شغلك " يدفع عبدالله فيسقط على الأرض "

عبدالله : لا .. مب رايح اكمل الشغل ... ولو سمحت لا تمد يدك علي

أحسن لك

سالم : يعني اشبتسوي يعني " يتشابك الاثنان في عراق وتحدث

معركة " تأتي المدرسة فجأة وتحضر الشجار بين عبدالله

وسالم

المدرسة : خير - خير ممكن اعرف شنو اللي صاير - صراخكم اسمعه من

الجهة الثانية

سالم : اتفضلي يا أبله أنا قائد المجموعة ومجد يسمع كلامي

راشد : بس أنا وجميل يا أبله بس أنا وجميل نسمع كلامه

صلاح : كذابين " يهمس لعبدالله "

المدرسة : صحيح هذا الكلام يا عبدالله ؟!

عبدالله : لا يا أبله أنا وصلاح وجاسم نشتغل ونتعب

سالم : " يقاطعه لا مب صحيح " احنا اللي كنا نشتغل ونقول حق

عبود ساعدنا مب راضي قاعد على الصندوق ياكل يوصخ

المكان

صلاح : الله وأكبر منه ( بهمس ) كذاب

سالم : حتى اسألي راشد

راشد : أيه يا أبله

الابله : آش رايك يا جميل

جميل : ما أدري ... بس كلام سالم صح

الابله : صلاح ؟

صلاح : لا يا أبله " ينظر إليه سالم وكأنه يهدده

" بتردد " اقصد لا يا أبله سالم صح

" الابله تنظر إلى جاسم "

جاسم : " يبكي " ابي أروح البيت

الابله : بس يا جاسم ... اسمع يا عبدالله انت مب احسن من باقي

الطلبه ... انت لازم تتعاون وياهم

عبدالله : يا أبله الكل لازم يشتغل احنا نشتغل وهم قاعدين مرتاحين

سالم : "مرتبك" لا أبله أنا أشغلهم بالدور

عبدالله : احنا نبي نسوي لافتات تدعو لحماية الشواطئ

المدرسة : ياسلام علي هذي الفكره الجميله

سالم : شفتي أنا أنا افكر يا أبله صبح قاعد لكن مخي يشتغل

عبدالله : " باستهزاء " يا أبله ترى كل الاشياء الحلوه سالم يسويها

المدرسة : " تعنف عبدالله " عبدالله انت لازم تسمع كلام سالم ، يقولك

نظف يمين .. يسار تنظف ، ولا تكون سبب للمشاكل

عبدالله : حرام عليكم ، أنا مسكين ودايماً اسمع الكلام يا أبله

المدرسة : التزم بالنظام وخليك بعيد عن سالم ،

سالم : عبدالله يغار علشان أنا قائد المجموعة .. يا أخي اشتغل وصير

مثلي

عبدالله : أنا ما أغار أنا أقول

المدرسة : " مقاطعاً " أنا ما أبيعك تقول أنا ابيعك تكون تلميذ مطيع

عبدالله : انشاء الله يا أبله

الابله : انا راح أرجع لمجموعتي واحب اذكركم بأن المنطقة اللي في

هاذي الجهة خطره - منطقة خطرة ياتلاميذ .. ممنوع الاقتراب

سالم : إنشاء الله يا أبله لا تخافين مادام أنا قائد المجموعة

صلاح : ذبحنا هذي قائد المجموعة .. جنة قائد الحرب العالمية الثانية

" تخرج المدرسة "

سالم : رشود رشود تعال معاي شوي

راشد : علي وين ياسالم

سالم : نصيد قباقيب

جميل : يله يا شباب نصيد قباقيب

راشد : لا ياسالم لا تروح هناك .. المنطقة خطرة

سالم : خطر .. شنو الخطر ، الابله ما تبينا ندش البحر ... بس تبينا

نشتغل ... يالله وراي " تقدم المجموعة بحذر سالم يدخل إلى

البحر "

سالم : يالله ياخوافين تعالو زين

راشد : لا يبه أحنأ نخاف الابله قالت لا تقربون ذي الصوب

- صالح : ارجع ياسالم ارجع
- جاسم : أنا مالي خص ابي اروح البيت
- سالم : يلا ياخوافين - روحوا كملوا شغلکم محد له خص فيني
- عبدالله : المسؤليه ياسالم .. ارجع " يقترب منه محاولاً منعه ... سالم
- يدفع عبدالله الذي يسقط على الارض "
- " يقوم سالم بمحاولة لنزول البحر ويسقط "
- سالم : رشود .. ساعدني ساعدوني يالربع ساعدوني .. لحقوا علي
- راشد : أنا مالي خص أنا خايف
- جاسم : وين الابله .. سالم مايعرف يسبح
- سالم : لحقوا علي بموت بموت
- " يقوم عبدالله بالقفز في البحر وانقاذ سالم "
- عبدالله : خلاص ياسالم خلاص .. أنا جيتك ومسكتك لا تخاف
- سالم : ارجوك ياعبود ساعدني لاتخليني اموت

عبدالله : خلاص ياسالم انت معاي خليك هادي

" يقوم عبدالله بإنقاذ سالم من الغرق مع حضور المدرسة

والطلبة إلى المكان "

المدرسة : شنو اللح صار شففيه سالم

عبدالله : ماسمع الكلام يا أبله ... ودخل المنطقة الخطره

سالم : أنا أسف .. أسف يا أبله أسف وايد

المدرسة : الحين ياسالم ، شنو النتيجة

سالم : الكل تخلي عني يا أبله بس عبدالله هو اللي ساعدني

المدرسة : علشان تعرف ياسالم أن عبدالله طيب ويساعد الجميع ويحبك

سالم : سامحني يا عبدالله أنا وايد غلطت في حقك

عبدالله : مومشكلة القبقب اللي تعلق في شعرك خذ حقي منك

سالم : أبله دلال أنا .. أنا ما استحق أكون عريف الفصل .. أنا اللي

خربت الفصل ، ولا استحق اكون قائد المجموعة .. أنا أناني

واحب نفسي سامحوني يا أصدقائي ، سامحني يا عبدالله

عبدالله : خلاص لا تبكي ، تراك تعور قلبي ، كلنا مسامحينك

المدرسة : لازم نكافء عبدالله على العمل والاخلاص والاحساس

بالمسؤولية

عبدالله : شكراً يا أبله دلال ، بس لاتقولين لي نظف الساحل

المدرسة : عبدالله هو رقيب الفصل لأنه تلميذ مجتهد ومخلص وصبور

والمجتهد له نصيب

صلاح : وأهم شيء يحس بالمسؤولية □ ممكن آكون المساعد يا أبله

المدرسة : المساعد اليمين وإلا اليسار

عبدالله : الاثنين يا أبلتي علشان الحجم

المدرسة : واتمنى ياسالم تكون تعلمت الدرس تعلمت أن الانانية وحب

النفس وعدم الاحساس بالمسؤولية صفات ما تليق بالإنسان

والانسانية .

" في الختام أغنية عن حب الوطن وحمايته والاحساس

بالمسؤولية تجاه النفس وتجاه الوطن وتقديم الخدمات مقابل رفعته في

سبيل وطن متقدم مزدهر " .

﴿ مع تحيات ﴾

مريم سيف